

MEMORIJALNI SIMPOZIJ POSVEĆEN AKADEMIKU PROF. DR NIKOLI ZDANOVSKOM

U organizaciji Poljoprivrednog fakulteta u Sarajevu i Odjeljenja prirodnih i matematičkih nauka Akademije nauka i umjetnosti BiH održan je simpozijum u Jajcu 2—4 oktobra 1974. godine. Tema simpozijuma je bila »Aktuelni problemi razvitka poljoprivrede brdsko-planinskog područja«, a iz te široke oblasti obrađena su četiri područja.

Poljoprivredna komponenta u privrednom razvitku brdsko-planinskog područja je bila osnovna tema uvodnog dijela simpozijuma. Na plenarnom sastanku održano je 9 referata koji su iznosili tendencije razvoja poljoprivrede u brdsko-planinskom području, sistem i tip poljoprivrednih preduzeća, vertikalno povezivanje proizvodnje i prometa kao i usmjeravanje poljoprivrede u tom području. Uloga službe za razvijanje proizvodnje i zaštita bilja u brdsko-planinskom području su bili izneseni kao problemi specifični za ove krajeve.

Rad simpozijuma se dalje odvijao u dvije sekcije. Sekcija A je obradila teme iz ovčarske i govedarske proizvodnje i proizvodnju stočne hrane. U toj sekciji je održano 17 referata.

Sekcija B je imala osnovnu temu problematiku planinskog mljekarstva, gdje je takođe saopšteno 17 referata. Raspravljalo se o savremenim problemima proizvodnje i kvaliteta mlijeka na brdsko-planinskim rejonima. Posebna pažnja je bila posvećena autohtonim mlječnim proizvodima, naročito sirevima, njihovoj tehnologiji i usavršavanju.

Iskorištavanje nuzproizvoda i primjena mašinske muže ovaca bile su teme koje su usko povezane sa problemima planinskog mljekarstva.

Na plenarnom sastanku i u sekcijama vođene su veoma iscrpne i interesantne diskusije i doneseni odgovarajući zaključci. U radu simpozijuma učestvovalo je oko 200 učesnika, istaknutih jugoslovenskih naučnih radnika, eminentnih stručnjaka iz privrednih organizacija, ustanova i JNA.

Ovaj simpozijum koji je razmatrao probleme brdsko-planinske poljoprivrede, bio je posvećen prof. dr Nikoli Zdanovskom koji je cijeli naučni opus posvetio izučavanju planinskog gazdovanja, ovčjeg mljekarstva i stočarstva. Tematika simpozijuma je postavljena tako da odgovara naučnom interesu prof. Zdanovskog, koji je među prvima udario temelje istraživanjima u ovoj oblasti. Problemi brdsko-planinskog područja i ime Nikole Zdanovskog, naučnika, nastavnika i čovjeka doveli su na ovaj skup veliki broj učesnika koje interesuje ova problematika.

Organizaciju simpozijuma pomogle su Privredna komora Bosne i Hercegovine, Zajednica za naučni rad BiH, UPI-Sarajevo, AIPK-Bosanska Krajina, Banja Luka, Hepok-Mostar. U toku simpozijuma posjećena je farma Nova Topola i mljekara Banja Luka.

Na plenarnom sastanku simpozijuma usvojen je prijedlog da se formira studentski fond prof. dr Nikole Zdanovskog za pomaganje i razvijanje naučnog rada kod mladih ljudi iz oblasti planinske poljoprivrede.

N. D.